

هو الصمد (الله)



بتسأل مين؟!!

م الأنبياء والأولياء والمرسلين!

أرض القبور متعطرة .

روح زورها.. من غير الرجا

وخلي الرجا للحي... (الله)

واحد أحد.. هو المُعين... (الله)

هو اللي خلق النور

هو اللي خلق الضيِّ

الكون بخلقه وخلقته عابد

حتى الحصى.. حتى الشجر

ساجد...

اسمع لصوت التراب
ع اللي اندفن شاهد
الكل عُرب.. وعجم
حتى اللي عَبَد الصنم
من صنعته الواحد... (الله)
طب قول لي مين يملك ضرر
أو نفع للمخلوق؟!
مين دا اللي يملك شفا
أو من حَكْمْتَه مرزوق؟!
"عيسى" طلب من ربنا يكفيه
"أيوب" صبر لله..
طب غيره مين يشفيه؟!
لا "موسى" صنع العصا

ولا وشوش الحية

المعجزة من ربنا..

واتفكت الحية

مين دا اللي يمنع موت

لما الأجل نصب الشباك والطوق؟!!

" يونس " نجا.. بدعوة رجا

يخرج سليم م الحوت

كيد النساء.. يغرق ف أرض البير

بالحلم والتفسير

وبحكمة الجبار...

يوسف أمين.. ووزير

مين دا اللي يمنع بلا؟!!

سيرة "الحسين" كانت دليل

من كربلا..

من وسط جيشه.. "علي"

الغدر طاله انقتل

ما قدرش يمنع قدر

والطعنة طالت "عمر"

وسط الصلا

لما السجود اكتمل

"والمصطفى طه"...

من كل فعل بريء

صلى عليه الله

لو كان بيشفى المرض..

خطف المرض ابنه

لو كان في ايده الهدى..

كان اهتدى عمه
في الهجرة خذ له دليل
طلب المدد (ربه)
والنيّة تهدي طريق
القوه نور في الليل
بالذكر والترتيل
فما تسألوش المدد
والقوة من غيره... (الله)
هو الكرمب الصمد
والهدى من نوره... (الله)